

FRONTEIRA TERRESTRE TIMOR-LESTE HO INDONÉZIA

Timor-Leste no Indonézia iha relasaun no kooperasaun bilaterál ne'ebé forte iha área lubuk ida. Nasaun rua ne'e sai nu'udar modelu globál ida ba rekonsiliaun no amizade konstrutivu. Timor-Leste no Indonézia fahe illa Timor: Indonézia iha parte oeste no Timor-Leste iha parte leste no mós enklave Oe-Cusse Ambeno. Tanba fahe illa, presiza define fronteira terrestre entre nasaun rua.



Saida mak akontese iha pasadu? / Saida mak Estadu rua konkorda ona?

Hafoin restaurasaun Timor-Leste nia independéncia iha 20 Maiu 2002, Timor-Leste no Indonézia hahú diskute sira-nia fronteira terrestre. Estadu rua konkorda ona katak demarkasaun ba fronteira terrestre sei bazeia ba Konvensaun 1904 entre Olanda no Portugal kona-ba Demarkasaun Dominiu Portugés no Olandés iha Illa Timór no dokumentu legál sira seluk ne'ebé relevante. Abordajen ida-ne'e reflète lei internasionál ne'ebé estabelese ona no prinsípiu *uti possidetis juris*, iha ne'ebé estadu sira ne'ebé foin independente mantein sira-nia fronteira koloniál anteriór sira hanesan fronteira internasionál. Prinsípiu ida-ne'e garante estabilidade no serteza jurídika.

Iha 8 Abril 2005, asina ona Akordu Provizóriu ida kona-ba Fronteira Terrestre ne'ebé mak rezolve maioria fronteira terrestre. Addendum ida ba Akordu Provizóriu ne'e asina ona iha 2013 hodi formaliza rezolusaun ba área adisionál sira.

Se mak lidera negosiasaun fronteira terrestre ho Indonézia?

Tuir Dekretu-Lei Nú. 87/2023 iha 19 Dezembru ne'ebé estabelese Gabinete Fronteiras Terrestres no Marítimas (GFTM), negosiasaun kona-ba segmentu fronteira terrestre ne'ebé mak seidauk rezolve lidera husi Primeiru-Ministru, ho GFTM fornese assisténsia legál no téknika.

Saida mak pontu situausaun negosiasaun fronteira terrestre ho Indonézia?

Daudaun ne'e, segmentu fronteira terrestre rua mak seidauk rezolve, Bidjael Sunan–Oben no Noel Besi–Citrana.

Ho lideransa husi S.E. Kay Rala Xanana Gusmão, prosesu diskusaun ho Indonézia inklui ona enkontru formál sira tuirmai:

- Realizasaun enkontru dahuluk Konsultasaun Ofisiál Seniór (SOC) hala'o ona iha Bali iha 2015, ho enkontru daruak hala'o iha Díli no enkontru datoluk hala'o iha Bandung;
- Iha 29 Abril – 15 Maiu 2019, realiza ona Vizita Konjunta ba Terrenu hodi delineaia segmentu Bidjael Sunan-Oben no halo levantamentou ba Segmentu Noel Besi/ Citrana;
- Iha 4 no 5 Feveiru 2020, S.E. Kay Rala Xanana Gusmão hasoru malu ho Ministru Koordinadór Asuntu Polítiku, Jurídiku no Seguransa Indonézia, S.E. Mohammad Mahfud MD, no Ministra Negósiu Estranjeiru Indonézia, S.E. Retno Marsudi, iha Jakarta, hodi konfirma no hametin nasaun rua nia kompromisu hodi finaliza demarkasaun fronteira terrestre;
- Iha 2023 no 2024, realiza ona enkontru SOC Espesiál rua ho objetivu atu konklui demarkasaun ba segmentu fronteira terrestre sira ne'ebé seidauk rezolve;
- Iha 21 Outubru 2024, Primeiru-Ministru Timor-Leste, S.E. Kay Rala Xanana Gusmão, no Prezidente Indonézia, S.E. Prabowo Subianto, ko'alia mós kona-ba rezolusaun ba kestaun fronteira terrestre ne'ebé pendente.

Saida mak Estadu rua presiza atu alkanse?

Antes finaliza fronteira terrestre iha área balun ne'ebé mak presiza atu rezolve. Segmentu sira-ne'e iha karakterístika kompleksu ne'ebé presiza diskusaun detalladu.

Aleinde finalizasaun ba demarkasaun fronteira sira, nasaun rua ne'e mós envolve iha diskusaun kona-ba arranju espesiál sira hodi garante continuidade ba relasaun sosiál, kulturál no ekonómiku entre comunidade sira ne'ebé hela iha fronteira, iha segmentu sira ne'ebé seidauk rezolve ne'e.

Timor-Leste no Indonézia kontinua servisu hamutuk ba finalizasaun demarkasaun fronteira terrestre.

FIXA
INFORMATIVA
FEVEREIRU 2026

Ba informasaun detalla kontaktu:

Gabinete Fronteiras Terrestres no Marítimas
Governu Repúblika Demokrátika Timor-Leste
Email: info@gftm.gov.tl
Tel: +670 7742 5544



**Gabinete
Fronteiras
Terrestres
no Marítimas**